

## Bekalan barang keperluan mencukupi

2020-03-18T09:25:40+08:00



RASMI: Alexander bersama timbalannya, Datuk Rosol Wahid (tiga kiri), Ketua Setiausaha Datuk Seri Hasnol Zam Zam Ahmad (dua kanan) dan Ketua Pegawai Eksekutif Loob Holding Sdn Bhd, Bryan Loo (kiri) pada perasmian outlet Tealive-Kooperasi Warga Kementerian Perdagangan Dalam Negeri dan Hal Ehwal Pengguna (KPDNHEP) di kementeriannya dekat Putrajaya, semalam. — Gambar Bernama

PUTRAJAYA: Kementerian Perdagangan Dalam Negeri dan Hal Ehwal Pengguna (KPDNHEP) memberi jaminan bekalan barang keperluan adalah mencukupi dan orang ramai tidak perlu melakukan pembelian panik.

Menterinya Datuk Alexander Nanta Linggi berkata beliau sudah mengarahkan kesemua 2,500 pegawai penguat kuasa KPDNHEP di seluruh negara untuk turun padang bagi memastikan pasar raya mengisi semula barang keperluan dan tidak menaikkan harga.

"Semua pengguna jangan lakukan pembelian panik. Tidak perlu beli bekalan makanan berlebihan kerana barang keperluan mencukupi berdasarkan maklumat KPDNHEP," katanya kepada pemberita selepas merasmikan cawangan Tealive di kementeriannya di sini, semalam.

Nanta berkata demikian ketika diminta mengulas mengenai pembelian panik yang dibuat orang ramai bermula Isnin.

Perdana Menteri Tan Sri Muhyiddin Yassin pada Isnin mengisyiharkan Malaysia akan mengenakan Perintah Kawalan Pergerakan berkuat kuasa mulai 18 Mac hingga 31 Mac di seluruh negara bagi mencegah penularan wabak COVID-19 yang dibimbangi akan menjangkiti lebih ramai rakyat.

Ini pertama kali dalam sejarah, Malaysia menguatkuasakan perintah seumpama itu.

Perintah kawalan itu dibuat di bawah Akta Pencegahan dan Pengawalan Penyakit Berjangkit 1988 dan Akta Polis 1967.

Nanta berkata pembelian panik akan menimbulkan banyak masalah, dan beliau meminta kejasama semua orang untuk berhenti melakukan pembelian panik manakala kedai dan pasar raya perlu memastikan bekalan barang keperluan sentiasa ada.

Ditanya sama ada kementerian akan mengehadkan jumlah barang yang boleh dibeli oleh setiap orang, beliau berkata kementerian tidak bercadang berbuat demikian buat masa ini.

"Sekiranya kami berpendapat perkara itu perlu, kami akan ambil tindakan sesuai," katanya.

Ditanya mengenai pihak yang mengambil kesempatan dengan menjual sekotak 150 unit penutup mulut dan hidung dengan harga mencecah RM150, Nanta berkata KPDNHEP akan memantau perkara itu.

"Pada masa sama pengguna juga perlu mengambil tindakan bijak. Kenapa perlu buat pembelian jika harga ditawarkan mahal," katanya. — Bernama